
Аҳмад Фарғоний номидаги Фарғона вилоят ахборот-кутубхона марказининг 120 йиллиги нишонланди

Ўтган 120 йил ичида Аҳмад Фарғоний номидаги вилоят ахборот-кутубхона марказига не-не инсонлар қадами етмаган. Яна кўпчилик бу жойни ўз тақдири билан боғлаган. Эркин Воҳидов, Абдулла Орипов, Охунжон Ҳакимов, Анвар Обиджон, Иқбол Мирзо, Энахон Сиддиқова, Маҳмуд Тойир каби ўнлаб Ўзбекистон халқ шоирлари, Ўткир Ҳошимов, Иброҳим Ғафуров, Худойберди Тўхтабоев, Аҳмаджон Мелибоев сингари забардаст ёзувчиларнинг қутлуғ қадамлари кўп теккан даргоҳ бу.

Бугун “Китоб, китобхонлик, кутубхона – маърифатнинг уч илдизи” номли илмий-амалий конференция ҳам ташкил этилди. Унда “Кутубхона – жамият кўзгуси”, “китоб – бадиий ва илмий интеллект”, “Архив фаолиятида кутубхоналар аҳамияти”, “Кутубхоначиликда замонавий тарғибот шакллари” мазуларида маърузалар тингланди. Кутубхона тарихига оид фильм намойиш этилди. Конференцияда вилоят ҳокими ўринбосари Ф.Қосимов иштирок этди ва барчани китобхонлик байрами билан табриклади.

Аҳмад Фарғоний номидаги ахборот-кутубхона маркази фонди қарийб 350 мингдан ошди. Айни пайтда Туркия, АҚШ, Германия ва Россиядаги дунёга машҳур кутубхона муассасалари билан маърифий ҳамкорлик алоқалари, ўзаро тажриба алмашинуви йўлга қўйилган. Кутубхона нафақат бадиий ва илмий, балки тарихий, луғавий, соҳавий ва нодир адабиётларнинг кўплиги билан мамлакатимизда етакчилик қилмоқда.

Бу борада Ўзбекистон Республикаси Президенти Администрацияси ҳузуридаги Ахборот ва оммавий коммуникациялар агентлиги, Алишер Навоий номидаги Ўзбекистон Миллий кутубхонаси ҳамда Фарғона вилояти ҳокимлигининг ҳамкорликдаги ишлари ўз самарасини кўрсатмоқда. Бугунга келиб, кутубхонамизда кенг кўламда қурилиш-таъмирлаш ишлари ҳамда ўқув залларини замонавий мебель жиҳозлари ва коммуникация воситалари билан таъминлаш амалга оширилиб, китобхонлар ва меҳнат жамоаси учун зарур шароитлар яхшиланди. Бугун 70 нафардан ортиқ ходим ишлайдиган ушбу зиё мажмуаси йилиги 20 минг нафарга яқин китобхонга хизмат қиляпти. Жамоада энг изланувчан ва фаол кутубхоначи-мутахассислар бирлашган.

Шу ўринда бир кичик янгиликни етказсак: академик Азизхон ва Лазизхон Қаюмовларнинг шахсий кутубхоналаридаги асарлари, улар фойдаланган китоблар вилоят кутубхонасига олиб келинди. Академик олимлар шарафига бағишлаб кутубхонада алоҳида жой ажратилиб, доимий кўргазма ташкил этилди. Беназир миллий маънавий мерос ичида Ғафур Ғулумдан тортиб Ўткир Ҳошимовгача бўлган буюк шоир ва ёзувчиларнинг ўз дастхатлари туширилган китоблар бор.

Фарғона вилояти ҳокимлиги Ахборот хизмати